

Wie die Leit su die Ende

Unserooner, wanner Hochzeitsdaach hott, der dut dann gern emol mett de Fraa doohie gieh, wo merr sich kennegelernt hott. Dann setzt merr sich uff die Bonk, uff der merr doomols gesotze, ihr Händche gehalle unn ihr gonz lieb ins Gesicht geguckt unn der merr doodebei gesaat hott, ob se sich vorstelle kennt, den Kerl doo vor ihr ze heirate, mettem Kinner ze kriegh unn sesomme ald ze wernn.

Meisdens war doo kooner debei unn wenn merr dann noch Zeit unn Lust hadd – unn Lust hadd merr joo immer, doomols! – unn sich die Geleeschenheit ergewwe hott, mol irschendwo hie ze schlubbe, dann hott merr villeicht doodemett oogefonge, was donn long nitt uffgeheert hott.

Wie menschlich, det monscher saache, unn er hädd recht demett, awwer die Ende, die makes genau so wie die Mensche unn dess iss doch enn scheene Zuuch von dene.

Woher ich dess waaß? Ich wills eich verzähle. Mir hawwe im Gadde enn kloone Fischdeich, nit greeßer als zwaa uff zwaa Meter, unn doodefoo iss noch enn Deil mett Sumpflonze bewachse. Vorsjohr, so um die Zeit, sinn immer zwaa Stock-Ende kumme, enn wunnerschee gefärbte Enderisch unn e unscheinbar Endeweibsche – die misse so soi, so mett Tarnfarbe, weil die joo später uff ihm Nest sitze misse unn von owwe vom Habicht unn von weidem vom Fuchs odder vonnere Katz nitt gleich geseh wernn solle – unn die zwaa Ende hawwe alls so doorumgemacht. Unn wie dess wie bei de Mensche aach bei de Veeschel iss, de erst duts Weibsche alls fortwatschele unn de Enderich mächt hinnenooch. Dess hott so e paar Daach gedauert, jeden Daach moins su geesche halb neun sinn die zwaa kumme, sinn um de Deich erum gewatschelt unn sinn aach ab unn zu ins Wasser gehibbt, die End vorneweg unn de Enderich hinnerher. Awwer uff oomol warn drei Ende im Gadde, dess Weibsche unn zwaa Enderische, doo hätter mol seh solle, wie die zwaa Männscher uffenonner losgonge sinn. Jeder wollt dess Weibsche hawwe, dess awwer hott im Gras gesotze unn iss nor uffgestonne unn e bissi wieder gerickt, wenn die zwaa Kämpfer ihr ze noh kumme sinn. Was will ich eich saache, der Enderich, der de erst doo war, hott den onnern verjaacht unn de arme Unnerleeschene hott sich e Stick weit eweck uffs Gras gesetzt unn hott nor noch unner sich geguckt, der war ferdisch mett de Welt.

Unn dann, mir hadde schunn gemoont, dass die Ende sisch villeicht bei uns im Gadde e Nest baue dete, hotts widder gonz schee geplätschert, mir gucke hie unn doo hadd sich doch de Enderich uff die End geschafft, hott se omm Hals metten Schnawwel festgehalle unn hott Hochzeit gemacht. Dann hawwe se sich geschiddelt, sinn uffgefloh unn fort warnse unn sinn nimmi kumme. Nor de Junggesell iss noch e paar Daach kumme, hott sich ins Gras gesetzt unn hott von de End getroomt.

Unn jetz kimmts, was ich omm Oofong verzählt habb mettem Hochzeitsdaach von unseroom. Unn ich saachs eich, die Ende makes genauso. Weil gestern hawwe merr im Gadde geschafft, unn uff oomol kam e Endepärche, die sinn ohne nooch uns ze gucke gleich ins Wasser, sinn enn Aacheblick geschwumme – unn schwupps! hott de Enderisch uffem Weibsche gehockt unn hott se omm Hals festgehalle, unn korz druff hawwe sisch alle zwaa geschiddelt, sinn außem Wasser eraus unn sinn fortgeflooche.

Gell, habb isch zur Frau gesaat, nitt nor dass die de Hochzeitsdaach nitt vergesse hawwe, aach weil se schunn e Zeitlong sesomme sinn werdd nimmi so vill Geschiss gemacht unn gleich zu de Sach kumme. Also wie die Leit, su die Ende.

Eiern Honnes